

崑山人物傳

題補訂梅花艸堂人物傳

崑山人物傳十一卷故明張元長先生梅花草堂集之一也聞之前輩謂先生文不苟作必淋漓盡致巖情欲絕極其意之所之務俾曲肖夫人而止要其立言必準諸忠孝以為指歸茲刻付梓行世已久字畫漫漶散

失幾半歲癸巳先生之族曾孫臯載
檢所存板授余曰殘缺雖多文獻攸
繫子其為我藏弄之余自問謏陋方
懼不足以辱良友之命乃不數年而
臯載又賡志以歿悲夫余惟物之成
毀雖各有數其一段不可磨滅之晶
英貫金石而泣鬼神則固有歷久而

不敝者在也爰購原本與諸同志補
訂成帙以廣其傳不惟三百年來吾
邑之名卿碩彥潛德幽光足以焜耀
寰區而臯載之抱殘守缺雠屢極貧
以至於死終不肯廢先人之手澤夫
亦可以少慰于地下矣若先生之著
述等身文章聲價昔賢評論已備余

又何庸置一辭因以舅氏宗伯顧公
全集序弁於編首附綴教語以誌慨
慕云爾

雍正二年甲辰臘月同里後學菊莊
汪中鵬拜手書於迎潮閣

梅花草堂集序

嗚呼元長先生而竟沒矣
先生沒吾邑其復有文章
乎哉先是吾邑有震川先

生所為古文詞暨舉子義
務在自得不顧世之譽誅
惟時王李才名盛天下屢
以意示震川先生冀相與

助揚共廣聲價而先生不
應也以故王李之徒故倚
扼先生文使不得列於七
子之林誰知百年之後竊

其隻字皆得托於大家當
時掎扼之者安在哉震川
先生沒元長先生起焉所
為古文詞暨舉子義亦務

在自得不顧世之譽譏而
又不以震川為宗大都崛
強不屑羞從籬下生活吾
邑之風概然也今元長先

生文具在讀之真有繪水
必繪聲繪月必繪光之意
每與人談論竟日不倦未
有不聞所未聞而去者韓

昌黎何蕃傳惜乎蕃之居
下其所以施於人者不流
也然而山澤澗溪之高下
雨豈有擇耶其殆謂先生

歟先生於余內戚也不以
余為謏陋每進而譚古今
之業因以其文相屬若余
之可以傳先生也夫余惡

是以傳先生其亦先生之
自為傳耳諸孫貧甚饘粥
不能給不忘手澤梓先生
文十之六以公之當世余

悲其志安忍無一言以識之

內姪詹尹顧錫疇題

張元長先生傳

長洲蔣鏞撰

每謂讀書操不律須索解人得其人千古神理宛相
遇于眉睫之間若寫生狀自余受書即求其人與其
書貌肖了不易得一夕遇元長先生于淑士座晤對
移時若庚桑畏壘之游意深已已而讀所為聞雁齋
稿則又恍遇先生真面目也噫嘻先生蓋異人真讀
書人哉余自是游先生靡歲間先生三歲能畫腹作
字十二歲為文章即有異解其尊人九川翁善誘兼
課古今業而先生靈襟玄對六靡所不徹弱冠英、

見頭角四方多北面問奇者儼然河汾臯比狀試有
司輒弗售而攻苦矜勤性靈益剌露于是為文章愈奇
自公車牘至名山業微而單詞小令皆深根名理抽
精藻林神采淋漓言、堪絕倒以故名大震席觀鷄
林爭相購以為異寶顧宮諭升伯每以一代宗工自
命狀一讀先生文廢狀返也先生有至性九川翁歿
終身抱霜露之悲獨念愛弟世長翁所鍾情中歲亦
告殞双淚益枯居恒嘗愴當歡忽悲浸不良于視狀
不廢緜帙命嗣子桐讀而聽之以耳代目探索彌富

已廢視淡寂益精研性命之學朝焚夕誦与古尊宿
相叅先生既以高才彩筆雄視千古用數竒負劉蕡
之厄豪情義胆無所見其竒而又奪其神明之用稍
稍寄情于酒人之遊以磨耗壯心余間遇先生坐上
嘗滿騷人俠客明裝點履雜以粉黛絲肉競奏錄事
浮白觴行如飛烏啼月落流連未已乃扣先生橐故
枵狀飲不能三蕉而少年豪舉劇与先生角竟夕不
撓晚進同人詩社居狀鄉祭酒筍輿蘭艇徜徉溪山
鮮雲麗月岸草汀花無遠不到、則披草而坐傾壺

而醉与鐵崖迂叟風流曠世神感于是四方名流折
節交欢先生豫章則王公止敬昆陵則沈公湛源茗
水則錢公龍門俱行部境内式先生之廬而造請者
海虞則宮詹錢公潤州則中翰劉公山東則司理王
公俱主盟千秋而執鞭拜与先生周旋者臨汝湯公
義仍則遙邈風期至欲假路符以踐入林之約先生
夷然曰行休矣吾無所復異于世而煩諸公胸中
乃挂一張生哉雖然文章千古事得失寸心知吾于
此道終不能忘情是吾親遺命也蓋世有布衣游而

驅駕一世才人一切冠裳逢掖盡入橐鞬中者吾得
元長暨新安潘生兩人吾指不更屈矣先生著作充
棟其最著者為崑山人物傳徵文考獻無幽不闡有
董狐太史之遺焉他若四書標畧筆談全書久已行
世若蘇長公編年雜紀崑山節孝錄梅花草堂詩文
集二百餘卷藏于家至于吳寄偶屬試拈經生語直
凌駕王唐諸先正後有傳明文者知無能置甲乙也
元長名大復晚號病居士一云息菴老人

菰蘆生曰吾覩元長先生舉體皆古人先生蓋澤于

文章者也昔子野廢視以審音而左史亦以失明有
國語先生之為文章庸知造物者不息我黥而補我
劓哉昌黎公論河東云使子厚窮不極其文章詞章
必不能自力至必傳于後無疑也又云使子厚得所
願為將相于一時以彼易此孰得孰失必有能辨之
者吾于元長亦云

梅花草堂集目錄

卷一 崑山人物傳

盧觀 熊熙 彭祖 充賴 儒瑛

秦玉 約 殷奎 璧 箕

王英 成憲 余燦

王明善 朱璣 唐汝爲 龔一德

陳則史 謹 附項駕 袁華 楊性

易恒 呂誠 范能 孫俊 沈本初

林鐘 泉

朱吉 定安 泰安 永安

王遜 復 曰敏 范從文

王震 父祖卿 偶栢

陸安 范廷珍 俞敬 支琮 徐任 附李文詠

王履 伯承 沈仲實

附沈貞 許律 董伯儒 許謚 陶浩 葛括 何順中

周振譽 張翬 范暹 吳璪 李郡

卷二 崑山人物傳

呂昭 旦 龔譽

陳皞 助 諫

龔詡

劉璉

夏昺 津 禹錫

周弁 璫

虞祥 震

夏晁

梁棟 昱 紉

王永和 汝霖

許剛 立 騰蛟

趙遠 昂

黃鐸 琚 玘 附張經

張翼 支鑑 王綸 附顧培 李元壽

卷三 崑山人物傳

卷一 吳凱 愈

周號

盛頤 洪

章賢 張翬

屈昉 祐 儒

蔣明

張翔

王資 庭 億

朱昌

甘霖

龔理 紱

夏佑 遂

張和 穆

沈愚 魯

沈訥 僕

龔琚 震

張能 注

卷四 崑山人物傳

朱旻 棧

葉盛

鄭文康 父壬

周恭 鄂

陳翊 王道

孫瓊 父宗

夏璣

朱夏 文

朱萱 觀

陸容

馮鈞 琨 夢龍

顧恂 父良

王鑑 漳 繼孝

吳瑞

張汝舟 世皞

卷五 崑山人物傳

陸鈇

高敞

姜昂

秦瓌 雷

高以政

王僑 一誠

張潮石璞邵魯生

王倬 附管琪

虞臣

周瑞 汝礪

周恭

黃雲

王秩

戚軒 孫學 附張翼

顧式

邦石

張安甫

周在

復俊

龔乾

邦衡

時煥

毛澄

周震

卷六 崑山人物傳

朱希周

顧潛

父宜之

周倫

梁鳴鸞

周廣

士淹

顧鼎臣

魏校

方鵬

鳳

元儒

柴竒

大履

盧志

秦雲

卷七 崑山人物傳

周鳳鳴 鳳起

王應電 承慶

張羽

張寰

王同祖

魏庠 希直

顧夢圭 允默 懋宏

晉憲 父鷗 驥

秦鰲

顧夢川 允燁 允烈

張廷臣

顧履方 謙亨 三高

孫雲

張情 意

吳中英

沈世麟

卷八 崑山人物傳

周大禮

王任用

王三接

李憲卿

周美

季龍伯

歸有光

張憲臣

陳敬純

周後叔 壽誼

孟紹曾

張鴻 沈孝

陳時 延經

顧夢羽 允元 允諧 允杰

王執禮

俞允文

梁辰魚

朱景運

曹治道

卷九 崑山人物傳

顧章志

徐子英

秦霑

傅遜

王逢年

龔起鳳

朱熙洽

顧永慶

潘蔚卿 士元

陳淮 陸懋

何天衢

張士淪

丁允亨

王執法

沈楠

陳允升

如京

周詩

顧履吉

謙光

支可大

王炳衡

炳璿

許承周
旋吉

顧咸和

震宇
晉瑛

支如璋

卷十
崑山人物傳

李同芳

馬玉麟

張棟

顧紹芳

王伯稠

沈魯唯

魯魯一源

諸壽賢

徐應聘

張文柱

王安鼎

王臨亨

陳嘉猷

王在公

歸子慕

張振德

李胤昌

顧天竣

顧天寵

許士紳

卷十一 崑山名宦傳

芮 翀

鄭 達

楊子器

方 豪

祝乾壽

王用章

劉應龍

聶雲翰

樊玉衝

王時熙

金 華

石肯構

李三省

朱 冕

沈應奎

梅花草堂集卷之一

吳郡張大復著

後學汪中鵬補訂

皇明崑山人物傳

有小引

昔揚子雲作殊言十五篇自言梗概之法得之臨邛林閭翁孺蓋考信若斯之難也予不類僭述先哲行事次第歲年叙論成傳凡十卷大要嚴覈耳目所及與其家譜牒所載乃至贈遺弔挽篇什編成一書原本事迹所得龔埏氏家藏寔多蓋龔氏自安節先生喜著

書多遺籍摘鉛次槩數十傳彌昌不類斯作
豈有至精之所想遘妄擬殊言所藉翁孺梗
概之法倍于作矣孔子曰述而不作信而好
古不好古不可以信不信不可以述吾鄉方
奉常故有崑山人物志六卷標位品目作者
之事則予不類之所不敢出耳其詳見自序

盧觀

子

熊熙

孫

彭祖克賴

孫

瑛子儒

盧氏其先龍興武寧人由平江徙崑山譜牒多缺不
可攷海虞季麓作崑山志勝國時崑山蓋有盧觀云

觀人有常饒隱行有常父鑑待補進士名系雖存然
行事不少槩見尚論盧氏者自觀始作盧氏傳觀之
後彬彬多風雅名節之彥各序論之俾後之覽者知
貞元之際于斯爲盛焉然其詳不可得而聞也

盧觀字彥達少有志行嘗受業湯彌昌錢重鼎之門
頗窺玄奧奉親味道外一無所問與人坦直無分貴
賤即其人有相負者置勿校歸斯受之無介于懷晚
嬰羸疾益肆志問學古今之業繕寫殆遍朱黃爛熳
卷軸芬潔著書九數種及卒勉教子孫讀書修行無

長言門人私謚曰夷孝先生子熊熙

盧熊字公武元末爲吳縣訓導洪武初以故官迫遣
赴京母卒告歸復起爲工部照磨尋以善書受中書
舍人遷知兗州州初罹兵革民力凋弊而大帥李善
長適營魯邸又浚兗河供億不貲民情洵洵公悉力
調護二役並就兗民不疲會錄刑人家屬事達詔獄
死上籍其家篋中僅餘麻桌上深悔之公嘗受業楊
維禎博極經史尤精六書既任兗州見印文訛謬嘗
爲上言之時已忤旨至是竟獲罪子彭祖

盧熙字公暨博學好古善楷法洪武初以薦授睢州同知時中原甫定歲復薦饑公一意休息惟恐傷之明年攝守事會廷詔御史清伍四方籍無見軍輒以民代而睢戶僅僅滿千黥行不下百餘輩公按籍而勾之得數人上御史御史大怒欲以格詔論公曹吏震懼請如民代例公持不可乃獨身往詣御史抗言睢戶凋耗一旦盡民而充非籍之伍則無睢無睢其又何守乎御史怒愈甚公堅不奪竟得免未久卒于官州人士女製服哭之盡哀勉歸葬送者數千人道

被大雨扶携流涕無一人少卻先是兄兗州公嘗贈
之詩云藎鹽清夢穩鐵石古心存人以為不愧斯語
也子充穎

盧彭祖字長嬰洪武末任武康縣縣丞永樂初薦授
禮部主事坐事為民阜城尋徵詣行在冠帶聽用以
疾卒公學求適用有父風 文皇知之然竟不能相
盡孫瑛

盧充穎字次農淵源家學行誼甚高嘗被薦給事誥
勅會世父兗州公逮死非其罪公負骸骨歸杜門著

書絕口不復言仕子儒

盧儒字爲已勤學有文頗自負人有請其稿者輒捧腹曰彼中有笥卒難相盡尋以薦拜中書舍人時被顧問上嘗命公作雪賦頃刻立就盡屈其同事者上深器重之有重齋稿行于世

盧瑛字克脩宣德五年進士性敏學博工古文篆籀不減夏太常太常每語人吾墨竹一派近在玉潤公太常婿也終刑部主事

論曰吾鄉縣治南故有盧氏世祿坊家宗老嘗指示

予輒言兗州居官事唏嘘久之其後坊不復見而額
藏夏太常墓傍盧家予得觀焉有老人出迓予自言
吾刑部後因道刑部慮囚江右事稍稍問其先世大
畧茫如也予視其庭宇甚潔葩卉爛然爲咨嗟良久
而出再往過之則爲墟矣盧氏自待補公已顯又工
詞賦兗州而下皆有官職爲時聞人刑部又成進士
君子之澤五世而斬豈盧氏信然歟今求其子孫而
不得也蓋嘗伏而思之文章操行造物者皆不輕與
人惟書與畫立名最久而盧氏世擅之母多取耶又

况其人安貧味道多著書有述于後者哉予每尚論其世慨然懷之兗州死非罪即亨于名乎猶當十世宥也

秦玉 子約

秦玉字德卿少孤貧與兄奉母家居讀書不求仕進志行卓然務苦約其身又能歌詩自放母顧氏織絰給業母令分志玉益感奮不勸聚徒講論二十餘年與兄未嘗異財用家政大小惟母兄是聽已身出入必稟而行母卒茹淡終喪未嘗澡洗俄隣家失火延

燒玉舍而母殯在堂岌岌不免玉憑棺號泣聲徹烟
焰中烈火熾然抵牖而滅人謂誠孝之感云年五十
三卒門人私謚孝友先生子約字文仲洽聞強記能
析諸家異同而統貫其說綽有心行之契詩名大噪
于時洪武初應詔試慎獨箴拜禮部侍郎尋以母老
辭歸天子束帛加寶鈔再徵詣京師選授溧陽縣教
諭典教八年動履具有矩矱御史練則成待制吳沉
薦約宿學遺老宜在館閣不報未幾請老卒嘗自號
淮海道人

論曰秦之先世家淮陰宋直龍圖太虛觀用文章操
行顯子孫散居海上後徙崑山崑山之秦自孝友先
生始孝友父庚庚父樛樛父棟俱隱德不仕其世系
皆可攷然未籍崑山故不具載昔龍圖公與蘇子瞻
輩好著書文采表于後世孝友淮海相仍不絕考其
述作孝友有詩纂探說摘要雜錄諸書而淮海道人
亦有樵海樵史孝節等錄龍圖之後可謂必復其初
元明之間駸駸與劉向蔡謨父子爭烈矣

殷奎 弟璧 箕

殷奎字孝章璧孝連箕孝揚天性友愛兄弟自相砥礪而奎名尤著爲一時文人所欽矚奎嘗受春秋楊維禎深明大義又好讀濂洛關閩之書留心名教于時事屢有建白洪武四年有司薦詣京師試上等當得官州縣而奎念母老疏乞近地便養忤上旨調陝西西安府咸陽縣訓導咸陽古渭城名勝有餘而兵燹之後文采未著公本性理之學善誘生徒循循不倦以間上秦嶺涉漢阪見白雲蓬蓬自東南起念老母在其下淒然出涕噫悒久之竟以病死訃聞譬議

以母屬箕而獨身走咸陽歸兄骨窀穸焉乃揮淚白
母又私于箕曰母老途窮形神孔悴汝盍慎諸吾豈
憂汝昕夕奉手雍州故不在天上行當自至汝慎無
念雍州念雍州其惟服勤老母聞者莫不唏噓掩涕
或慮其涉遠道又司訓宮貧難返骸骨而壁日夜間
闕丹旄無恙告母襄事母亦安箕色養眠食猶常其
後箕舉秀才試廣西僉事終太平府推官

論曰殷先生孝章好著書予得覽其目如咸陽志關
中名勝集陝西圖經渭城寤語等篇意必有感慨悲

戀之情觸事而作而惜乎後世無傳其苦心不少概見盧克州熊陳博士潛夫稱為孝子出處死生瑩然不滓亦足表其素矣然非二弟歸骨養母惡能無憾哉君子所以致嘆于在原之什也

王英 孫成憲

王英字俊伯洪武初貢詣京師授山東道試御史歲滿授御史每有章奏輒削其牘世莫聞知而高皇帝愈器重之特命署都御史事黜陟惟允居內臺凡十年陞刑部主事試郎中母老乞養出知寧海縣

文皇帝即位召還復郎中尋擢陝西按察司按察使
已改山西秩滿進嘉議大夫仍命治陝公之在西陝
也簡易有體獄至隨決不務深文巧摘而民以不寃
僧伍壽張之徒却步讐服既得代還京馳馬顛頓至
徐泗間疾作夫人閻與其僕王保隨侍徬徨莫救相
泣以歿勉含歛資斧弗滿一金用佛氏荼毘法歸葬
故里鄉人痛悼之卒時六十三子寧安定定子成憲
初名廷綱以字行號真愚先生恂角時已知名黌校
雅爲葉文莊盛所賞識其後偃蹇秋闈不售應詔試

吏部選授樊都尉府訓導都尉故興于文學名知人
獨引重先生事靡細大咸從審畫與吳文定寬王文
恪鏊王三原恕賦詩飲酒頡頏當世後滿九載當遷
京官公以老母乞外陞秀水教諭獎勤率惰諸生尊
親之居母喪會葬秀水士送者四十人服闋補定海
得歲九十六考終于家

論曰高皇帝嘗手書敦厚王英揭之殿壁以故吾鄉
之學士大夫下至小婦稚子必稱敦厚公云敦厚公
歿六十年定海始述其事請吳文定表諸墓道即文

定亦惜其歲久而不能詳也然以高帝之明聖進退大臣人莫能測而敦厚公獨久居內臺凜凜稱職式厚其終是非盟心勿欺不有其身能若是乎殿廷之揭毋其退焚奏牘精誠有所感著與何簡在若斯之殷也志稱敦厚公居鄉恂恂與人易嘗鞞入市門門者縛之公笑曰庶人不鞞禁也其如我官人何命取幞頭示之門者謝公曰君縛鞞人不縛官人何謝之有有負齮者與公並道而隘擠公墮水公攝衣起夷然不顧其後齮者復遇公棄所負却走公召慰遣

之鄰翁具雞黍飯公而令適會宴公辭令就鄰飯欣然人怪問之答曰貧家無易事且吾居鄉何必造令此三事者予為童子時蓋耳熟焉斯與漢石建周仁張歐諸君子何擇哉傳云賢者識其大者不賢者識其小者天下之士不出其鄉即論公者或不盡庶幾近之予猶惜定海公文采不少槩見其行事頗著于虞叅政臣之書採次為傳復載其壽予先王母詩一章詩曰堦前葵萼如金卮堂中老人垂白絲金卮滿引紅入面白髮萬縷生春姿清晝沉沉靜歌舞笑語

喧闐閣花鼓膝下兒孫獻壽杯邀迎王母來徘徊開
卷奕然致有蕭散之氣將令讀者知識小之意云

余燠

余燠字茂本超悟絕倫美丰姿嘗從殷奎陳潛夫受
春秋胡氏傳遂精其說里稱俊才有御史行縣美公
公曰御史皮相耶恐不足盡天下士御史改容謝之
洪武六年詔取賢良詣京師公應詔試入太學選授
承勅即陞通政司參議試吏部尚書十七年授尚書
本部上特命公定考績法公爲人祇慎謙和不遺故

舊每賜休沐布衣徒步遍謁隣里有不值者輒曰煩
爲道吾故余待詔兒鄉人至今傳美之

論曰虞書三載考績三考黜陟幽明典銓之于考績
重矣 高皇帝罷中書省左右丞相設九卿百揆時
叙揔于冢宰其實天子之相也皇帝慎簡天官不次
遷擢一時典銓者受成將美日不暇給類若無所事
事而考績之法特以命公此何如簡在哉雖甚盛德
稱任使英主在御夫安得高華終老哉自公以後詹
徽見殺翟善以驗封司主事驟試尚書黜陟如彼定

考績者宜何如凜凜也洪武之世公可謂銓局一人
而前志不載公考績事特序論之見公之居鄉恂恂
與其在朝廷無以異也而世之小夫朝稅褐纓寇夕
聞于閭里猶沾沾車上舞哉

王明善 朱璣 唐汝爲 龔一德

王明善字復初別號樵玉性剛介矩步詳視動有令
則嘗念天下甫定應從儒術童而習之可成天性乃
闕館聚徒訓飭不倦百里之間束脞之贄畢集其門
公益慷慨自負校訂訛謬判定句讀整衣危坐聲振

金石一時興文之彥州里相望絃誦聿新

朱璉字廷儀父宗海有士行至璉益感奮力學以春秋爲已任嘗葺數椽于學宮之側安處徒衆一時執經問難者望廬而集至室隘無所置席顧設大帷庭中猶不能盡公性剛正幼從王樵玉游習其儀範說者謂不愧師門云

唐汝爲號文谷學務該洽不名一經其教因材而篤隨授隨解英特之彥有甫成誦已盡通其說者史學書法一課俱下士大夫家競相延致即宦遊數千里

外多載與俱主賓之情彌久彌肅甚有書之遺誠令
子孫世世延之母爲勢家所奪晚歲賓於鄉白皙飄
鬚衣冠皓偉左右服勤皆一時譽髦之士論者榮之
龔一德字允咸漢陽判承恩之孫通經涉史屢試不
售退隱東市河上授徒養母不就高門幣聘顧司馬
王轉運常調之請爲東道主莫得也樊孝介慎簡都
講辟公爲政公謝曰老人眊矣生平不欲訓高門子
弟乃僕僕垂白時拱揖貴人之前哉令賢而許之

論曰國初陳振祖潛夫蔚有聲華盧伯融昭詩文清

俊史家稱其善訓迪教子弟有法度也師之時義大矣哉然陳自華亭司訓崑山遷爲國子先生盧任揚州教授于吾鄉人士未旦旦矣非藉王朱兩先生草昧初闢人習其野疇若于訓而彬彬焉嘉隆之間師道式微競走榮貴如唐如龔斯亦矯矯于鷄鶩之群者哉 高皇帝滌瑕盪穢還之文物彌昌彌熾一鄉之士論世者詎可令其沒沒無傳也

陳則 史謹

詩文二業至于我朝斷自北地信陽其本始實由高

季迪氏季迪手闢草莽奪漢魏人已饗之利而自專其德當時學士溺于所聞何論作者即索解人政復不可得矣予攷邑志諸先生業文章毋慮數十家無能出楊鐵崖之學其知信季迪實能副之者得二人焉著爲傳

陳則字文度家貧力學以師範聞于鄉里洪武七年由秀才舉任應天府治中轉戶部侍郎左遷大同府同知陞知本府公少與高啓徐賁張羽楊基輩相倡和嘗賦紫菊得句云惟有魏花顏色似春風秋露不

宋文公集卷之十一
相同同社亟稱之呼陳紫菊

史謹字公敏少從昆陵倪瓚郡人高啓遊博學好古
工詩什善丹青甫寇從戍滇陽洪武末用翰林學士
王景薦授應天府推官左遷湘陰丞既謝政僑居金
陵自號吳門塾樵年七十餘以老疾終有獨醉亭詩
集行于世

論曰紫菊翁著詩甚多不概見即當年所遺百篇寥
寥無傳矣而獨醉亭稿亦絕無及見之者讀偶武孟
錄得所爲與史敏結交行一篇其詞云故人故宅居

婁城嗟予避地臨東溟兩鄉相去不多遠擇交已結
鷄豚盟適從別來三十載百粵東西隔嶺海臨風對
月每思君人寰滾滾知何在我今行年七十餘客遊
都門扶病軀莫愁家東杏林下握手一笑情何如子
居巷南我巷北幾度論心話疇昔輔車今日幸相依
故作歌詩寫胸臆三復斯言政堪與志傳相攷信而
志云公字公謹誤也吾鄉人物薦舉甚都如項叔馭
駕之庶平袁子英華之該博楊秉中性之敏贍與其
父慶源皆有述于世要之不離鐵崖之宗陳史二公

故是吾鄉開山主無疑耳

易恒 呂誠 范能孫俊 沈本初

易恒字久成其先廬陵人祖斗元以宋咸淳進士尉
常熟攝警崑山遂爲崑山人今世所稱蓮峰先生者
也父偉字成大饒風格初試更平江後以吉水州通
判致其仕恒性簡澹卜居淞南之大泗讓仰讀俯思
無域內想嘗闢地數百弓引流種樹號曰泗園興有
所會嘯咏不輟以此終其身所著有陶情集子孫散
處讓上脩然之致至今勿絕

呂誠字敬夫抗志高潔不祈榮利所居饒花竹點翠
飛紅殊有深林籬落之趣過者望之不知其室之通
也邑令慕其該達請爲司訓屢聘不許耳目聞見一
寓于詩楊維禎稱其特絕瀟散不讓袁華時稱袁呂
或曰呂性慎密袁自謂弗如云

范能字仲能少從毘陵謝應芳游精醫喜吟尤工法
書永樂初被徵詣郡賦詩上郡守願養老母自全其
天年守憐而許之日以著述爲事墻墉几席皆有雙
韻世傳淞南集于時號入室弟子曰孫俊俊字叔英

父映雪翁自華亭徙居澱湖之陽至俊始築別墅于
磧溪讀書觴咏既老不輟葉文莊爲序溪南集至今
稱磧溪孫氏

沈本初字大中賦性嚴重訓養子孫號有矩度鄭主
事某嘗聘爲泮墅義塾師既至鄭不迎謁力辭去杜
門賦詩有韋孟風小楷絕類顏平原時稱二絕楊文
襄被徵欲載與俱辭曰已無絕藝匡賢相豈有虛名
重友生文襄械幣候之又辭曰身安老圃無餘念興
寄青山有遠情年八十餘終

論曰夫士簡身砥行名不出其家文采葩流則令聞
載而行之二者宜何擇焉以予所聞林下諸人其存
者大都邑乘之緒言耳其集其集其詳不可得見矣
呂范辭辟不就沈大中不備禮而去易先生著書灑
上皜然不滓自非彬彬質有其文者予何取焉史載
蓮峰墓隱隱馬鞍西麓如蓬萊日出之鄉可望不可
即而磧溪數椽巍然如魯靈獨存斯亦何與人事哉
要之皆先立其大者矣

林鐘 子泉

林鐘字仲鏞其先魯人自高以上附籍杭州高祖少
雅宋文林郎潮州推官曾祖和卿元德慶路儒學教
授祖輿平江路崑山州同知父仲山始占籍華亭生
公洪武中辟授崑山儒學訓導訓迪有聲會上臨軒
選士和御製思得賢才詩稱旨擢知湖廣慈利知縣
縣苦茆岡峒蠻出沒爲患朝廷勦捕之兵連不解公
肩輿獨往諭以禍福利害群蠻稽顙靡然從化未終
三考用求賢辟擢天官考功郎中永樂己丑奉命扈
從巡狩超拜亞中大夫參山東布政司事庶績咸乂

會女妖唐賽兒反與方伯就逮以歿公言溫氣清饒
膽畧屢更煩劇卓爾不群初任崑山諸生甫投分即
翕然宗師之每相與語見林先生覺意表言外別有
箴規可謂教思無窮者焉而公亦樂其土風遂卜居
黌序之左自號松谷道人著書若干卷子泉字揚伯
能讀父書不營名利周文襄稱爲君子

論曰聞之長老與林先生語如冬日送暖膚革充然
即小婦稚子願若其訓退而各自得也予嘗過夏生
暉家謁先生像須麋不矜冠履有適宛如所傳聞語

也厚積未伸卒罹刑戮君子惜之或曰 文皇帝時
未設巡撫故藩臬禍福迥異今日其所遭遇然矣夏
生之六世祖元爲公婚知之特詳予用其語表出之
或曰生所居故宋王氏逸野堂林先生卜居處至今
夏氏守其業云

朱吉 子定安 恭安 永安

朱吉字季寧洪武中被薦授戶科給事中時賦長稽
違勘合上震怒命廷臣論死籍其家公上疏言勘合
之說本以照驗歲糧魯否完納如使歲糧及限即勘

合亦不過查驗虛文今照得各省糧犯但稽勘合不
缺正糧伏賜昭蘓以弘恩宥上從之洪武二十二年
有詔肅清胡藍逆黨所在承風頗開告許橫及無辜
寃濫已甚公又疏言雷霆震物威不崇朝上帝好生
春回幽谷往者病狂不逞之徒已膏斧鑕所有引繩
披根之類允屬矜疑射影無憑蒙沙可憫奏入上特
嘉之有織文繡衣之賜翌日欽諭廷臣溪加獎美自
後寂無告言者尋以墨妙改中書舍人遷侍書翩翩
禁闥荃苒十年出爲湖廣按察司僉事理寃釋滯不

可殫述會註誤繫微久之永樂大赦復召爲中書舍
人奉勅題高廟神主春賞特厚已謝政歸篋中惟
法書名畫路遇故人負租抵罪輒粥以償之年八十
一而終子三

長定安字士隆精篆籀學相傳玉峯前有篆塚其所
瘞也翰林吳均王洪嘗爲銘誌

次泰安字士粟永樂三年鄉薦授內黃教諭歷調安
仁安吉陽信三學所至條教必以尊傳註惇行誼爲
本再滿三考乞致仕甚力故人楊文貞楊文定慰留

之不可杖履逍遙終身不談世務得歲九十有三
次永安字士常好蓄古今書籍工行草出入晉唐間
時稱三傑

論曰朱氏之籍崑山自中翰公始中翰不忍以身之
察察受偽吳縉垢故逃之崑卒亨于宦勝國延祐間
有德潤者中翰父也字澤民初用趙文敏孟頫之荐
歷官編修鎮東儒學提舉浙省平章參謀長興太守
所在有聲又以書畫特聞天下至中翰益顯我朝設
科取士而中翰用薦辟起家登賢書者又是內黃公

始成弘之間御史恭靖絡繹聯翩于吾鄉以一二數
矣其始故宋直秘閣子榮一人之身也秘閣公以六
歲藐孤提携譜牒寄身椀柁間渡江而南以有今日
斯亦宇宙之大奇也哉予攷朱氏人物多務忠厚耻
爲浮薄雖復筆墨淋漓無囂然自滿之意樹德務滋
其所自取耳志稱朱之先有應得者營墓陽抱夢讓
鬱林天與澤民卒興朱氏此亦道家所時有非影嚮
傳會之詞也宋兵部郎中貫爲睢陽五老中一人有
德有行蓋朱氏始基之矣

王遜

子復

孫曰敏

王遜字謙伯洪武十七年進士崑山第進士者自公始初授上高縣縣丞蒞事明敏剖決如神考上上詔還京師令上殿糾儀復稱旨超拜江西道監察御史時朝廷法嚴而御史職侍從在上左右公凜凜嚴自治無惰容然性峭直敢言事上多優容之一夕上卧便殿公與同直者侍詔問公月光無故入御座于律云何公請如夜入人家律上顧笑則公故悔之矣未久求去詔許之已又原之召還公公懼竟服重死子

復字從道生三月孤既長感上之原之也發父書晝
夜讀尋登宣德五年進士第授行人司副已拜南京
廣西道監察御史公悲感交至思報稱而耿直絕類
其先御史于是人稱小御史云小御史之言事盡衆
不能堪卒戍遼陽病死鐵嶺城當是時鄉人哀兩御
史死直不盡其用然幸有子曰敏字仁功負特絕之
資年十六就童子試提學金御史竒之欲與籙公引
非令辭不就則鄉人更竒之必能成二父志也久之
弗售而諸從游者往往脫穎以去晚膺里選司訓石

門而公故不以司訓自隘尊師道成人材石門子弟
于是彬彬多文學之士矣

論曰士君子處創業之世事英主欲直行其志而免
禍災者豈易哉兩御史死直事世莫能詳然聞之長
老皆無悔于心云石門雖伏不礙雄飛化成九載拂
衣而去里後進側目嚴憚之公亦杜門著述不與物
接斯何愧兩御史趨操乎石門黌舍災俄失小御史
遺像所在灰飛諸生家自鬚以上者面部宛然石門
召工填出之藏之家廟人謂御史入火不蒸也

范從文

范從文字復之魏國文正公十二世孫父原良獨身
官潮州卒邸舍葺築葫蘆山中曠徑僻公間閱萬
里求之莽互不可別識乃號哭淒風苦雨間血盡眼
枯忽土陌得所識石遂負骸骨以歸洪武丙辰以國
子生奉使稱旨擢監察侍御史轉戶摠部主事奏免
株連盜倉罪百餘人同官螫之罪叵測而上謂侍臣
曰是先憂後樂之胤也寬之謫役莊浪螫者譟不止
意必殺之追戍金齒徙廣南公挈其妻子日走荒江

斷峽與魑魅逢迎海上久之赦免永樂初用薦起
儒學歷金華東安金鄉三縣乃致政歸公既久去其
廬舍墳墓皆非所有勉力稍復之建祠祀潮州公
修范氏宗譜年八十七考終

論曰予所見范復齋先生墓志如此志墓者沈玄谷
魯與先生家世姻好幼行也其時近而可信予頗採
其說作范先生傳邑志謬悠不足憑所載官職年月
履歷與沈志雅不類學者溺於所聞如此孔子曰吾
猶及史之闕文也今亡矣夫

王震

王震字子東父曰祖卿洪武初爲行人開雲南道夷
山湮谷設施爲多震初應秀才舉選令益都會歲大
稔民採靡蕪給食常不繼洵洵思亂公開倉賑之吏
請未受旨非例公訶之曰民饑如此而候旨賑耶直
吾死民矣一境全活者無筭廷論推重之遷爲益州
同知公性慷慨饒膽畧守益如爲令時而加笞焉先
是益州佛寺有像能言禍福小民祈乞者晝夜相屬
於道不可止公至爲設大戒置觥對像轟飲無所聞

說移時寂然忽勅左右吏爲取醉狐以來吏跡草中
得巨狐袒而卧公命縛之柱狐醒乞貸公顧吏曰左
道惑民于律云何狐哀懇即左道無敢傷物乃命釋
之像不復言

論曰王益州之縛醉狐廩廩夷山堙谷之畧矣傳稱
益州故文恭綸九世孫云建炎初文恭爲御史中丞
陳攻守之策甚力宰相不能用其後扈駕南遷請與
韓世忠夾擊金虜前謂石畫而當時議者莫之是也
數傳爲行人開道滇南烈矣益州之政妖狐怖匿直

取之飲酒談笑之間無矜憤色剛正之于王氏甚矣
哉文恭不營第宅晚依薦嚴寺以居歿葬白馬涇北
而益州行人之墓不可攷矣

偶桓

偶桓字武孟落拓嗜酒喜吟詠嘗贊其詩謁楊維禎
倪瓚瓚亟稱之謂有超乘挽強之力日升川至之漸
公喜退語其友雲林故是解人洪武二十四年應秀
才舉授荊門州吏目幕府多暇觴咏不輟久之致其
政歸遇淮南故人蔣用文載入京師僑居建安坊下

綸巾藜杖放情江山間久之乃還卒年八十二嘗自
作挽詩云堪憐八十白頭翁自笑生前萬事慵北闕
薦賢雖有剡南村作守竟無功耽詩不愧詩才拙嗜
酒惟愁酒盞空留得五湖風月在浪遊誰復繼遺踪
公家桃源涇嘗築江雨軒居之著江雨軒集再遊秣
陵雅慕醉吟先生之為人又作醉吟錄若干卷行于
世

論曰予讀醉吟錄信老杜晚歲漸于詩律細爲偶先
生言之也先生嘗夜起見星月交輝花影零亂自念

往與諸賢作社登金氏覽勝樓雨晴風雪類有吟咏
故不知景乃在此因賦樓夜詩雲隨鶴影翻踈箔月
送花陰過盡闌凡先生所自得如江之雨樓之夜讀
者可以想見其人而惜乎其墳墓子孫皆不可攷也
有偶嫗者事佛張家橋小菴中能言其先世嘗有瓦
枕漏箭鷄鳴歷然可聽與今志所載相合予時尚小
恨不詳詢其世系云

陸安 范廷珍 俞敬 支琮 徐任

李文詠附

君子之道始乎夫婦所能行及其至也雖聖人有所不能盡舜爲天子皋陶爲士瞽瞍殺人此聖人所能盡者也孟子求其說而不得姑爲之懸解云爾聖人受命尺地莫非其有夫何有海濱可以訖然忘天下者哉 高皇帝刊定曆律與民更始誰能攬其法苟盡吾海濱父子之情藉令當年有聖人者以身處吾鄉陸孝子之事其必不能故曰雖聖人有所不能焉千載之下論而勿議可也予按前志直叙其事而附以五人故不敢以聖人之所不能謂後世必如是

而孝也然亦有幸有不幸焉

陸安邑三畝民父曰德甫好結客嘗緩急人難願以
身翼庇之而國初法嚴允保結人脫逝或保結非類
者連坐無赦德甫以事論死將磔于市安年二十而
初婚浹旬別其婦鍾刺血書代父典刑于衣袂間獨
身走京師德甫忍淚面之屹不動乃伏闕請命詔特
許之赴西市曹就義觀者千人無不人人泣行下安
色不變揚揚如平常德甫伏屍哭盡哀提其骨東歸
葬薦巖寺南二十步既七十年從孫霈請沈誠學廣

作孝貞記萬曆甲辰崑山教諭沈應奎爲文祭其墓
范廷珍字惟中父彥良以宿望表鄉里註誤連坐事
叵測與弟廷珪詣府請代上官故頓挫之淚盡流血
百折不少却得末減遣戍河間公故善醫遂以醫濟
河間民無貴賤老幼皆爲診視病者輒起其人或忘
報勿校也晚歲喜吟學益該洽雅好率更手筆一時
齋閣題署必以乞公公亦欣然應之行年九十而筆
墨不衰魚箋鸞素紛委几席其神愈王葉文莊公嘗
記其事

俞敬字用禮父得水母王皆早背寄養張氏張故戎家子好雷人專自行己意張母孫憐而庇之如子公亦謹事孫母如王母痲癢疾痛無弗盡也永樂八年孫遘危疾將不起公剖左脇割肝和糜飼母母忽愈亡何氣發疾如初又自嚙左膊肉愈之事聞閭里間爭相愛重恐其冒張氏姓遂爲戎家子也聞于朝文皇帝嘉之詔旌其門擢尚寶司丞洪熙改元陞少卿復俞姓贈父母如其官正統六年陞卿卒得年六十有四

支瑛字敬將長七尺軒軒出人頂而口吃不便道詞
同舍生或嘲之歛容唯唯而已學務深入不祈頓造
人謂之魯勿較也家貧奉母不能具純綿令母安寢
每冬月母不能寐輒取已所御青布袍覆母疊跣而
坐候伺母醒乃出有郡倅慕其高義凌晨候公公貧
無他袍低回久之而母睡方熟遂着短後迺倅倅知
其以袍覆母寧失候官長愈益重公周文襄嘗餽之
粟帛必曰以爲孝子母壽正統間里選終南京留守
衛經歷葬虞家巷

徐任字惟用世家婁東父彥輝宣德中歿于京邸公
徒步號哭歸櫬里中衰麻染血如丹母楊氏有疾迎
醫檢方萬端莫效乃祈神佑晝夜稽顙頭搶地不起
而疾如故則三剖其股煮糜進之母病尋愈嘗語人
吾所持奉母惟此寸心雖母在曩者瞑眩之時意神
必許我而今幸無恙得常事老母即居陋巷不堪其
憂何害乎晚又自號陋樂云

李文詠號蒼石面削骨見衣表未三十即謝去其諸
生耽娛樂久之而父大經適謝沂水政還家則又益

務爲娛樂以歡其父雨暘寒燠勿間也萬曆己亥十一月二十四日從沂水公夜歸客且醉又圍燈而觴之沂水性不飲顧獨好客醉漏二鼓始登樓就寢孝子寢其下俄聞爆裂聲帶夢披衣直上而僕者李安面且焦爛從煙燄中牽孝子下孝子直上不顧俄棟摧瓦裂家人洶洶莫知所出質明發礫視之僅餘一股而沂水公以覆庇故尚具體祭外知縣樊玉衝請御史䟽旌之有詔建坊旌孝子門而孝子妻王氏請建坊興賢里曰先恭簡之宮墻在焉建如議

論曰范惟中請代父死得戍隣里爲俞用禮請落戎籍得官遂至太常何曩者陸孝子赴義之慘也李蒼石投燭救父斯與陸孝子何擇焉凡人一往之念皆可爲聖人青袍覆母麻血如丹令此一寸心稍稍自知其爲孝鮮不敗矣吾鄉至性人未必盡傳于世如陸如李以一二數矣往見齊禮坊右有古綽楔曰故孝子徐協祥之門今不知所在

王履

王履字安道興孤心遠讀書無所不極心手都靈所

作詩文書畫皆成獨造無規則首尾而神脉清澈欲
令千載上未有古人洪武初嘗游太華凌跨三峰覺
青柯坪爲下淋漓揮灑筆翰精良得四十餘圖且爲
之記爲世傳寶初從朱丹溪彥脩學察毛髮洞五臟
作傷寒三百九十七法辯標題原病式一卷百病鈞
玄二十卷醫韻統一百卷索隱開微皆先賢所未發
子伯承醫名藉甚兩都無子傳其壻沈仲實仲實傳
其孫承先縣令方豪嘗旌承先門曰助孝

論曰自王安道游太華百餘年山東李攀龍記之俯

三峰望中原見黃河從塞外來下窺大壑精氣之所
出入自詫善載腐肉朽骨者也其言甚壯以觀安道
所紀鈎深跨險直令飛仙失路鬼無家矣安道故有
奴人阿留能解主癖驚叫險絕皆其主之所欲言亦
奇矣哉詩文書畫皆字內靈氣透漏之路而軒岐一
法可回造化指數吾鄉如沈貞許律董伯儒許湛陶
浩葛哲何順中周振譽之醫如張翬范暹吳燾李郡
之畫如支鑑張翼王綸顧培李元壽之書各于其時
而霸其曹夫子兼之則安道一人耳廬丹谷有言讀

安道所著書登峰造極如其游太華時也士有特絕
之行舉一該百皆可不朽王安道其是乎

梅花草堂集卷之一

終